

Mid-Day Dogri News Bulletin

15 Sept. 2025

समां - 12:25 hrs.

<><><><><><>

LG Cargo Service

उपराज्यपाल मनोज सिन्हा होरें अज्ज श्रीनगर रेलवे स्टेशन थमां जम्मू-कश्मीर दी पैहली नियमित संयुक्त पार्सल उत्पाद- ‘रैपिड कार्गो सेवा पार्सल’ रेल गड्डी दी शुरुआत कीती। इस मौके पर राई-बाई मंत्री जावेद डार बी मौजूद हे। एह नमीं सेवा मध्य- कश्मीर च बडगाम गी आदर्श नगर-दिल्ली कन्नै जोड़दी ऐ। एह इस खेतर दे आर्थिक एकीकरण च इक महत्वपूर्ण तरक्की दी नुमायंदगी करदा ऐ-कीजे खास मालवाहक रेलगड्डी तेज- सुरक्षत ते मती किफायती परिवहन प्रदान करदी ऐ। एहदे कन्नै कश्मीर दे मशहूर सेऊएं ते होर दुए फलें गी दिल्ली दे बजारें ते मुख्य भरै च बेहतरीन स्थिति च पुजाने दी गारंटी होग-जेहदे कन्नै बपार च बाददा होग ते करसानें दी औंदन च बी बाददा होग।

<><><><><><>

Arms & Amm Recovered

जम्मू दे आई.जी.पी. भीम सेन टूटी होरें जंदे रोज घोषणा कीती ऐ जे सुरक्षाबलें पुंछ च आतंकवाद दा समर्थन करने आहले त्रंऊ जनें गी गिरफ्तार करियैं भारी तदाद च थह्यार ते गोला-बरुद दे कन्नो-कन्नी 7 ए.के. रफलां बरामद करियैं इक महत्वपूर्ण उपलब्धि हासल कीती ऐ।

सोशल मीडिया हैंडल “एक्स” पर इक पोस्ट च आई.जी.पी. जम्मू होरें इसी जम्मू-कश्मीर पुलस आसेया कीती गेदी इक शानदार जांच-पड़ताल करार दिंदे होई टीम दे अथनक जतनें दी सराहना कीती-जेहदे कन्नै एह कामयाबी हासल होई। पोस्ट च उनें अगगे आक्खेया जे दृढ़ निश्चय ते कारियें दी जांच दे नतीजे कन्नै आतंकवाद आस्तै हमदर्दी रक्खने आहले त्रंऊ लोके गी गिरफ्तार कीता गया ऐ। 7 ए.के. जिन्दे चा 4 पैहलें बरामद कीतियां गेइयां हियां ते कन्नै गै बड्डी मात्रा च थह्यार ते गोला-बरुद बी बरामद कीते गे न।

<><><><><><>

Sewa Parav Namami Ganga

प्रधानमंत्री नरेन्द्र मोदी हुंदी अगुआई तैहत सरकार,सेवा ते सुशासन दे मंत्र कन्नै बदलाव आनने ते प्रगति लेई अनथक तरीके कन्नै कम्म करा करदी ऐ। अज्ज इस खास श्रृंखला “सेवा पर्व” च अस तुसेंगी दस्सगे-जे मोदी सरकार नै कियां खरे तरीके कन्नै साढ़े पर्यावरण ते जैव बन्न-सबभन्नता च बदलाव आंदा ऐ। मुख पैहलकदमियें जियां प्रोजैक्ट टाईगर-लाइन ते चीता तैहत लुप्त होआ करदियें प्रजातियें गी परतियें जीवित कीता ऐ। भारत हून दुनिया दी सबभनें कोला मती चीते दी आबादी आहला मुख्य ऐ ते मुख्यै च 891 एशियाई शेर न। वेटलैंड संरक्षण दा विस्तार 91 रामसर स्थलें तोड़ी होई गेदा ऐ-जेड़ा एशिया च सबभनें कोला मता ऐ। “एक पेड़ मां के नाम” अभियान तैहत 142 करोड़ कोला मते बहूटे लाए गे।

जंगल दा दायरा बढने ते लोकें दी मजबूत भागीदारी कन्नै भारत इक्क पर्यावरण मुआफक ते टिकाऊ भविक्ख आहले पास्सै अगड़ा बदा करदा ऐ।

<><><><><><>

Satish Jammu

वाहन मंत्री सतीश शर्मा होरें कल जम्मू जिलें दे बाढ़-प्रभावित इलाकें जियां समवान-खड़ाह बल्ली-बट्टल-धक्कड़ ते जोगवान इलाकें दा दौरा किता ते उत्थें होई दी तबाही ते जरूरी समयाने दी सप्लाई दा जायजा लैता। मकामी लोकें कन्नै गल्ल करदे होई उनें एह आश्वासन दिता जे इनें मुश्कल हालातें च सरकार पूरी चाहली लोकें दा समर्थन करोग। मंत्री होरें सरबन्धित अधिकारियें गी खल्के ते बाढ़ प्रभावित इलाकें च लोकें गी राशन-गैस सलेंडर समेत जरूरतें दे होर समेयान पुजाने दे निर्देश दिते ते सब्भनें सरबन्धित मैहकमे गी रलियै जतन करने आस्तै आक्खेया।

उनें दूर-दराज दे इलाकें च ढांचागत सुविधाएं गी बी होर मजबूत करने आस्तै जोर पाया तां जे बाढ़ ते होरनें समस्याएं दे असर गी घट्ट कीता जाई सकै।

<><><><><><>

ITR Fake News

आयकर यानि Income Tax विभाग नै सोशल मिडिया उप्पर फैलने आहली फर्जी खबर जेदे तैहत ITR फाईल करने दी तरीक 30 सितम्बर दस्सी गई ऐ-उसी खारिज करी दिता ऐ ते इक अधिकारिक पोस्ट दे राएं विभाग नै इक्क बारी परतियै साफ किता ऐ जेह ITR यानी Income

Tax Returns फाईल करने दी खीरी तरीक अज्ज यानि 15 सितम्बर गी ऐ ते करदाताएं गी सलाह दिती गेई ऐह जे ओह सही जानकारी आस्तै छड़ा आयकर विभाग दे अधिकारिक सोशल मीडिया हैंडलें उप्पर गै भरोसा करन।

<><><><><><>

Yudhvir –India (A) Team

जम्मू-कश्मीर दे प्रतिभाशाली तेज गेंदबाज युद्धवीर सिंह चाढ़क हों गी आस्ट्रेलिया-ए खलाफ 30 सितम्बर -2025 थमां शुरु होने आहली त्रै मैचें दी इक-रोजा क्रिकेट श्रृंखला च भारत-ए टीम लेई चुनेया गया ऐ। भारती क्रिकेट कंट्रोल बोर्ड (बी.सी.सी.आई.) नै इस महीने दे अखीरे च कानपुर च आस्ट्रेलिया-ए खलाफ होने आहली त्रंऊ मैचें दी इक-रोजा श्रृंखला लेई कल भारत-ए टीम दी घोषणा करी दिती ऐ। युद्धवीर नै रणजी ट्रॉफी दे पिछले सत्र च शानदार गेंदबाजी प्रदर्शन करदे होई 7एं मैचें च 26 विकेटां हासल कीतियां हियां ते सैयद मुश्ताक अली ट्रॉफी दौरान बी 7एं मैचें च 9 विकेटां हासल कीतियां हियां।

<><><><><><>

Jashn-e-Dal Water Sports Festival

श्रीनगर दी “डल झील” पर पानी सरबंधी खेड्ड महोत्सव “जश्न-ए-डल” दा आयोजन होआ करदा ऐ। त्रंऊ-रोजा इस महोत्सव च 700 कोला मते प्रतिभागी हिस्सा लै करदे न। एह प्रतिभागी 20एं कोला मती खेड्डें जियां केनोईंग-ड्रैगन बोट-केयाकिंग ते शिकारा दौड़ च हिस्सा लै करदे न। इस महोत्सव दा आयोजन जम्मू-कश्मीर पुलिस नै कीते दा ऐ।

एदी शुरुआत 13 सितम्बर गी होई ही ते एह् अज्जै तोड़ी चलोग। एदा मकसद घाटी च
सैलसफा ते नौजवानें सरबन्धी गतिविधियें च बाद्दा करना ऐ।

<><><><><><>